

Parlamentario Independiente Marisol Lopez Tromp como fundador di Parlamento Hubenil ta felicita nan cu nan 10 aña di existencia



ORANJESTAD(AAN): Parlamentario Marisol Lopez Tromp, kende ta e fundador di Parlamento Hubenil, ta felicita nan cu nan 10 aña di existencia y ta deseana hopi animo y perseverancia pa nan sigui dilanti. Durante un biahe di Parlatino na Peru na 1999, Parlamentario Lopez Tromp a participa na un reunion cu tabata trata e topico di hubentud. E tempo ey como miembro di Parlamento, Marisol Lopez Tromp a tuma nota cu hobennan tabata participa activamente hunto cu e adultonan Parlamentario den reunionnan cu tabata riguarda temanan di hubentud. Tambe tabatin hobennan di otro paisnan presente cu si tabatin un Parlamento Hubenil. E tempo ey Aruba ainda no tabatin un Parlamento Hubenil. Parlamentario Lopez Tromp a gusta e concepto aki hopi y el a keda graba den su mente.

Tempo cu el a bira Minister di Asuntonan Social, esaki ta un di e prome proyectonan cu el a bisa cu Aruba mester di dje y cu mester worde funda. Pa e motibo aki na aña 2003 hunto cu un comision di profesionalnan riba tereno di educacion, social y huridico a sinta dialoga, brainstorm, reuni y pensa cual ta e mihor forma pa lanta un Parlamento Hubenil duradero na Aruba.

E tempo ey e studiantenan cu a forma parti di e lansamento di e Parlamento Hubenil tabata hopi entusiasmo. Na 2003 Minister Lopez Tromp a conretisa Parlamento Hubenil na notario Taekema. A cuminsa un campaña di informacion na tur e schoolnan pa asina

splica nan kico ta un Parlamento Hubenil y tambe stimula hobennan pa participa y drenta e Parlamento Hubenil. E studiantenan por a vota pa drenta Parlamento Hubenil.

Un di e prome schoolnan cu a worde bishita tabata Mon Plaisir College pero a pasa tur school pa stimulan pa forma parti di e Parlamento Hubenil aki. Awendia, despues di 10 aña, por mira un Parlamento Hubenil duradero y cu ta gosa di confianza den nos comunidad y ta meramente pa crea lidernan den nos comunidad. Ta siña e hobennan bira lidernan y ta siñanan pa debati y forma nan opinion sin cu tin politica involvi. Esaki tabata un di e condicionan cu Parlamentario Lopez Tromp a pone e tempo ey, pues cu no ta hinca politica aden pero cu si ta prepara e hobennan pa bira lidernan den nos pais den cualkier ramo. Awe tin un Parlamento Hubenil ta un organizacion madura y cu ta dunando su frutonan den nos comunidad cu diferente hobennan lider den nan ramo. Parlamentario Marisol Lopez Tromp ta felicita e hobennan cu e logro bunita aki.